

國朝畫識

冊三

國朝重刊

卷一百一十五

國朝畫識

卷之七

沈宗敬

鄭梁

翁嵩年

湯右曾

薛英

錢以培

李昌

王銓

蔣元洽子綸附

許永

戴思望

虞沅

高翔

華胥

祝昌

賴鏡

黑壽

赫頤

龍鯤

沈圯瞻

陸鑄

嚴載

藍漣

江聲

孫浪

湯光啓

張畫周禮

何文煌

顧峻

馬元馭子逸女荃附

張子畏

邵曾復

邵曾詔孫珣附

宋駿業

徐溶

楊晉

顧昉

朱易

邢原邠

曾爽

弟奕附

唐

醺姚世仲

陸道淮

王者佐

胡節

楊謙

姚珩

沈益

徐蘭

許宏環

吳肅雲

金章

鄭嵩

朱佳會

吳良

周愷
劉元稷

高岑
于旌金璐王基永

梅南

金侃

陳鳳翥

姚世翰

黃泰來

顧正陽

張璠

徐元房

鄭淮

何亢宗

佟毓秀

趙尹

俞俊

阮芳

張渭

項松

張城

張昉

張錫璜

陳履斌

吳訥

黃堅

俞笙

李能白

史榮

國朝畫識

南匯馮金伯冶堂纂輯
吳縣袁廷檣綬階參訂

沈宗敬

沈宗敬字恪庭號獅峯華亭人文恪公荃子康熙
戊辰進士官至太僕卿山水師倪黃兼巨然法筆
力古健名重士林水墨居多青綠亦偶爲之小幅
及冊頁尤佳性情瀟灑無達官氣而風裁頗峻明
音律善吹洞簫雍正三年卒於官

畫徵錄

沈文

恪公荃學行醇潔名重館閣書法尤推獨步士以
一長來謁者輒爲噓植子宗敬字南季兼工書畫
仕至四驛館卿

江南通志

沈南季寫山水思致高

遠谿徑妙絕超然楮墨綽有古人之風

圖繪寶鑑續纂

畫如禪亦有南北二宗吾鄉董文敏爲南宗
之慧能得其傳者若趙文度宋石門諸君皆一時
之秀族叔祖獅峯館卿遠承法乳每作山水用禿
穎乾皴遺貌而取神洵逸品也

沈大成學福齋集

鄭梁

鄭梁字禹梅又字寒村慈谿人康熙戊辰進士選庶吉士改戶部主事歷陞郎中出知高州府時議開礮川梁謂此爲鯨鯢出沒導之路也持不可嘗學於黃宗羲聞戢山劉先生緒論寓意於藝文詩類江門定山文近震川宗羲亟稱之復善畫旣歸里旋得末疾右體不隨遂以左筆驅染如平時跌宕文史人目爲仙吏云甯波府志 鄭禹楣善山水暮年右臂不仁以左手畫更饒別致工詩有曉行詩最佳人呼爲鄭曉行 畫徵錄

翁嵩年

翁嵩年字康飴錢塘人康熙戊辰進士官廣東學道善山水以枯瘦之筆作林巒峯岫氣質古雅疎拙畫家習氣毫髮不能犯其筆端洵士人之高致藝苑之別調也 畫徵錄 羅軒以文章名東南督學廣東矢心謹恪務得真才先是學使者以瓊州在海外檄生童赴雷州攷試嵩年曰吾豈以一人易千萬人命乎出入忠信何畏焉竟渡海後著爲令甲事竣歸里有別業於西湖退休其中以詩酒

書畫自娛壽八十二終所著有天香書屋藁白雲山房集友石居集浙江通志翁嵩年博學好古寫山水超軼冲淡瀟灑秀潤時露筆端圖繪寶鑑續纂

湯右曾

湯右曾字西厓仁和人康熙戊辰進士官至吏部侍郎兼掌院學士詩高超名貴不落一語凡近工行楷書尺牘華瞻流麗人爭貴之浙江通志又善山水查慎行題沈房仲所藏湯少宰畫卷云淋漓五株樹墨氣互盤薄試問輞川翁何須著邱壑人讀公詩惜未見公畫我今領其趣妙豈在詩外敬業堂集

薛英

薛英字雪涵樂清人本姓侯少孤聰穎勤學工詩古文詞書畫一宗董文敏康熙甲子領鄉薦任蕭山教諭新文廟崇聖祠教育有方多士懷之所著有春曉園雪堂詩文集温州府志墨香按英係侯思炳子思炳亦工畫見五卷

錢以均

錢以珩煥次子康熙庚午科舉人質敏學裕兼工書畫嘉興府志

李昌

李昌字爾熾號謹菴仁和人康熙庚午科孝廉善花鳥草蟲寫來生生欲動圖繪寶鑑續纂

王銓

王銓字東發長洲人康熙庚午副榜累官禮科給事中敦氣誼重然諾善繪事書法江南通志

蔣元洽子綸附

蔣元洽字煥俞寫山水氣韻高遠游虞山爲秋林平遠吾谷踏葉二圖石谷王翬見之嗟賞爲合作子綸少卽工畫早卒無錫縣志

許永

虞山許南交其家世多顯者顧獨沉酣詩畫中歌行近體蓋宗晚唐而畫則出入北宋諸家與文沈異派而同源堯峯文鈔許永字南交青浮之子也精繪事色澤鮮妍神采飛動琴川志

戴思望

戴思望字懷古休寧人能詩詞工書法畫宗元人
峯巒林壑清疎淡宕秀逸膏潤寢入其室矣每一
藝成輒自矜爲希世之寶性狂介有潔癖妻死不
再娶扁舟往來三吳兩浙間遇佳山水輒留戀不
能去聞畫家輒訪友之然不肯輕許可能鼓琴善
諧笑或有時旬日不語人謂癡絕類虎頭卒構風
疾而卒畫徵錄 周起辛贈戴懷古詩戴子超羣
士丹青天下無山川開絕異草木使榮枯詩律自
應細書名慎作奴長安何日到好與辨時趨 倚玉
堂詩錄

虞 沅

虞沅字畹之江都人善花草翎毛勾染工整賦色
妍雅得古人遺法至今賞鑒家爭重之畫徵續錄

高 翔

高翔字鳳崗號西唐甘泉人善山水撫法漸江又
參石濤之縱恣亦善於折衷者工繆篆刀法師程
穆倩諸藝均可觀惜皆於近人問途徑不若畹之
之肯撫古耳同上

華胥

華胥字義逸無錫人工畫人物士女密緻而不傷於刻畫冶而清豔而逸古意猶存其水墨者直參龍眠之座畫徵錄
華胥善畫人物與惲壽平花卉王翬山水並稱秀麗豔逸所畫老子出關圖最工無錫縣志

祝昌

祝昌字山嘲廬州舒城人久居新安晚客漢上於元季諸家真跡莫不臨仿故畫多逸致
圖繪寶鑑續纂
祝昌廣德州人山水學漸江後擴於元季諸家性孤介遇之不以禮雖餅金購尺幅不許也
畫徵錄

賴鏡

賴鏡字孟容城西人少讀書增城白水山亦號白水山人逃禪丁壽寺性雅淡工點染山水筆力遒勁氣格高凝有沈石田風致一時聲噪五羊吳越人官粵者往往欲求其一箋一簋而不可得作詩清削幽異自成一家字近仿文衡山遠則蘇長公

時共稱其三絕二云廣東通志

黑壽

滿洲黑壽高尚不仕樂與江浙文士遊人稱滿洲高士善畫山水學董文敏畫徵錄

赫頤

赫頤一作奕號澹士山水宗法元人而獨開生面峯巒渾厚草木華滋迥異時流豪傑士也官大司空同上

龍鯤

龍鯤字圖南號天池少習舉子業長而棄去工詩善畫尤力摹右軍書法高郵州志

沈屹瞻

沈屹瞻字樹奇吳江人以畫竹得名技實不止於竹也葉岐翁贈予雙松大幅筆極高古非時輩所能及百幅菴畫寄

樹奇爲人清介絕俗求其畫不易得惟煮狗肉餉之醉以酒則揮灑不倦晚年棄家卒於三高祠墨林韻語

陸瞻

陸癡名曉字日爲華亭人性狷癖故人以癡呼之
善山水自成一局其法用挑筆密點由淡及濃不
惜百遍林巒崖石間烟雲糾縵墨氣細縕亦可喜
也其布置務求奇癖不屑作常蹊能爲尋丈大幅
浙江巡撫屠公館之西湖踰年而卒屠公爲歸其
喪畫徵續錄陸曉浙江遂昌人僑居於松故自號

遂山樵畫初學二米房山後參以己意自成一家
所居在超果寺南欲得其畫者每登寺一覽樓望
其家炊煙至午後不起乃持銀米往易之否則終
不可得故人以癡目之婁縣志

嚴載

曉同里有嚴怪者名載字滄醅山水亦好立奇境
嘗畫一古藤蔓延糾結蟠兩山頭一人崎嶇攀援
而下凡畫多類此人亦癡絕家極貧不能以多金
眩之勢亦不可屈也人目爲怪怪聞之喜遂自名
怪焉畫徵續錄墨香按嚴怪畫粗硬不入格遠遜
陸癡

閩中藍漣公漪吾友也精篆隸之學以山人自署而詩情畫筆蕭疎高奇雖間與名公卿相酬接然意所不可不能屈也梁佩蘭六瑩堂文集 梁文煊題藍公漪水仙小幅穿苔倚石影疎疎清潤仙姿玉不如筆底化工成逸品香薰長與伴圖書清容堂詩集

江聲

吾邑有江飛濤聲者詩文之外兼工墨竹雪坡亦極稱之柳南隨筆

孫浪

孫浪字白閒善畫得雲林大癡之神而性疎放不宜於俗購其畫者不輕應或招之寘密室具紙筆爲鍵戶使不出久之興會漸動則潑墨揮灑風度更爲橫絕其圖章則古鏡紐也較異他篆人取爲信高淳縣志

湯光啓

湯光啓字式九高士王武弟子也武爲明太傅鑿裔孫讀書避俗寫花卉翎毛遠師趙昌邊鸞近法

陳淳陸治而生平慷慨赴義家中落卒爲清門光
啓寫生盡得其傳而好義亦復相似遇友朋急難
幾欲忘身晚歲家蕩然藉筆墨餬其口幾于三旬
九食亦略無悔心也嘗論寫生以生動有書卷者
爲上工緻而乏天趣雖貴重不脫匠氣深此藝者
難其言長洲縣志 湯處士藥房精畫花鳥年七十
九卒于黃埭詠歸亭集

張畫周禮

王武工畫花鳥多逸筆弟子張畫字文始號研山
長洲人周禮字令邑同里人畫徵錄

何文煌

查士標弟子何文煌字昭夏號竹坡畫筆超老趾
及踵矣書亦得其法焉同上 何子昭夏探梅鄧

尉箸詩四章意遠詞鍊讀之彷彿穿雲渡水登萬
峯之顛使人神往昭夏好游復精繪事嘗歷南衡
永寶諸處又嘗登黃山天都峯絕頂作畫吟詠頗
多皆可傳誦而余尤愛其舊作香國梅爲海人家
花作田之句在亭叢稿

顧峻

顧峻字大巖吳人李布衣果題其畫龍云顧子長於山水心師古人而不泥其跡有黃子久浮嵐暖翠之風偶爲旅堂寫龍舉圖絕壁摩天海水飛立一龍蜿蜒乘雲欲起烟霧隨之化工之筆雖僧繇何讓在亭叢稿 顧子大巖世其家學寫山水直以悟入嘗從老友高簡澹游遊精研有年又愛玩宋元明人真跡久而神韻生動自抒天趣遠方士大夫走縑素造請者日益夥而大巖處之淡如同上墨香按大巖尊人漢音世父舜音俱善畫山水

馬元馭子逸女荃附

馬處士元馭字扶義常熟人少聰敏長於畫其點筆信手皆有生趣好讀書嗜酒間從里人錢孝廉陸燦巖高士熊遊學益博老屋數椽雜樹竹木琴尊碁矢與諸名流日觴詠其中有田數十畝在尚湖之濱困於徭役率不計值售以去家由是日落而畫益工王石谷輩以畫名嘗稱之曰扶義神韻飛動不泥陳迹高於陳道復陸叔平矣繼又師惲

南田壽平盡得其傳相國蔣文肅公處士同里也
嘗與處士講論六法其時若汪殿撰繹楊處士晉
無一日不聚青桐軒及蔣公官禁近以書招處士
入都數以疾辭處士爲人孝友與人交誠信而負
意氣嘗曰盈天地間隨遇可以移情惟山水入人
最深俯仰往事如空花流水此心不拘于物而游
乎物之外棲遲林谷可自娛矣遂自號棲霞年五
十四卒在亭叢稿馬元馭作沒骨法最工蒼秀生
動久而不脫一時與王翬山水並馳名遠近子逸
女荃皆能傳其業琴川新志惲壽平弟子馬扶義
得其傳授名于時余薄遊太倉於居停處處見其畫
冊自題謂得包山石田遺意觀其超縱處誠有陸
氏風規而老健遠遜石田蓋能品也世人誇重未
免過情畫徵錄

張子畏

張子畏武進人惲南田甥工花草得舅氏法宋漫
堂撫吳得黃筌全樹杜鵑花圖花約數伯餘神彩
煥發望若火樹插空氣蒸蒸欲動異寶也思摹一

副本念非子畏不能延至署屬以圖圖成漫堂賞之以爲亂真同上

邵曾復

邵曾復無錫人畫花鳥師惲壽平人耿介亦似之

江南通志

邵曾詔孫珣附

邵曾詔字衷綸兄曾訓善書曾詔善畫時稱雙絕其畫花鳥秀麗軼倫游京師公卿交推重之謂可嗣惲南田孫珣紹其學無錫縣志

宋駿業

宋駿業字聲求爲文恪公得宜長子由副榜官至兵部侍郎善書畫長洲縣志聲求篤好山水受業

于王石谷作宋元人小品清韻可挹畫徵錄

徐溶

徐溶字雲蒼號杉亭更號白洋散人居吳江工山水初亦泛學無宗中歲得師石谷遂大變其積習筆墨蒼秀小幅及淺絳尤妙好爲斷句亦秀韻

同上